

Se lascion su la Region

L'assessor regionel a la mendranzes Manfred Vallazza é ruà te Fascia a rejonèr coi raprezentanc de la istituzions amministratives e culturales de val

Mendranzes - Te sia raida per cognoscer la istituzions di lese de mendranza e si raprezentanc, en lunesc prim de oril l'assessor regionel Manfred Vallazza é ruà te Fascia, ensema con sie secretèr particulèr Dominik Oberstaller, col secretèr de l'ofize Tobias Weger e la funzionèra responsabola Giovanna Chiocchetti.

Dò esser passà te Comun General, con la procuradora Elena Testor, l'conseier provinzièl Luca Guglielmi e sie secretèr Matteo Iori i se à binà te la sala Heilmann del Museo Ladin olache a i spetèr fèra l'president de l'Istitut ladin Antone Pollam e sie diretor Fabio Chiocchetti, la sorastanta de la Scuola de Fascia Mirella Florian, l'responsabil de l'Ofed Vigile Iori e l'president de l'Union di Ladins Fernando Brunel.

Pollam e Chiocchetti ge à portà dant en curt a l'Assessor e sie staff i fondamenc de l'Istitut cultural de

Fascia, l'percors storic e identitèr fascian e i maores projec porté a compiment e en cors, soralut tel setor editorièl e linguistich, ence desfrutan la neva tecnologies per ruèr vejìn a la jent.

I à sottrissà l'ruol emportant de la Region, reingrazian l'assessor da dant Detomas per l'sostegn abù e palesan la speranza de poder seghitèr a se lascèr su la Region, istituzion fondamentèla per tegnir adum i ladins.

En particulèr Pollam à dmanà che la Region palese al più prest sie raprezentant per l'nef Consei de Amministrazion de l'Istitut, a na vida che la Provinzia posse nominèr CdA e President neves e l'Istitut posse jir inant con si lurieres, e l'ge à presentà l'projet per valorisèr l'area de Sèn Jan desche zenter sozièl, amministratif, cultural e religios de Fascia: n projet sul papier da egn e che se spera l'posse tachèr a se concretisèr, pean via da la

Ciasa de la Moniaria, che l'Comun General cogn restruturèr col finanziament stanzià da la Region. Chiocchetti à tout enveze l'ocasion de la prezenza de Guglielmi per ge dmanèr che desche Conseier ladin l'spenje acioche la Provinzia de Trent fae i intervenc che vegn dmané da egn per comedèr l'frabicat de l'ICL che l'è metù n muie mèl.

Te Museo Vallazza à podù veder ence na clas de bec che faeja na lezion sui prumes reperc e insediament storic te val, e apontin sun chest la sorastanta Mirella Florian à rejonà de "La scola te museo", n projet finanzià da vèlch an da la Region per poder arseguèr na persona che deide ti percorse didatiche, e de l'autra scomenzadives de la Scuola Ladina de Fascia per tegnir sù l'ladin, en particulèr l'percors de scola plurilingue envià via jai 15 egn col projet "Na comunanza che empèra".

Ence l'president de l'Union Fernando Brunel à sottrissà l'emportanza de la Region, che la tol ite la maor pèrt di ladins, envian a no se desmentìr che chi é aldèl di confins ma i à dmanà da passa 10 egn de vegnir touc ite. Brunel à dapò envià Vallazza a tor dant ence la Lia di Comuns Ladins, con sie president Silvano Parmesani, ajache l'è la raprezentanta istituzionèla de duc i ladins.

Manfred Vallazza, che l' sarà assessor per duc i 5 egn ajache no l'è più pervedù la "staffetta", l'ha confermà e sottrissà l'conzet de l'emportanza de la Region per tegnir adum i ladin e ence l'autra mendranzes che vif sun sie tegnir, ajache eneben te chesta pruma roda de scontrèdes l'asse vedù che l'è situacions belebon desferentes anter na mendranza e l'autra, l'è semper de utol vardèr de lurèr adum per troèr soluzions percacentes en sinergia con la Provinzie e duc la istituzions, i Istitue cultural, la Scuola e La Use di Ladins per l'stravardament del lengaz, che l'è l'aspet de maor emportanza per la mendranzes e che cogn vegnir portà inant semper miec.

Lucia Gross



L'assessor Manfred Vallazza e sie colaboradores à scontrà i raprezentanc istituzionèl e cultural de Fascia te Museo Ladin.